

解州全志目錄

本州

卷之一

星野

沿革

疆域

形勝

舖遞附

卷之二

山川

水利

渠堰附

風俗

物產

卷之三

城池 村堡 坊里 橋梁附

壇廟

公署

卷之四

學校 書院 義學附

田賦 丁徭 雜課 鹽引附

戶口

倉儲

兵防

卷之五

職官

宦績

卷之六

選舉

卷之七

選舉

附薦辟

貢生

例仕

例貢

武秩

封廕

卷之八

人物

卷之九

人物

卷之十

列女

卷之十一

古蹟

坊表

寺觀

林墓附

祥異

卷之十二

奏疏

卷之十三

藝文

卷之十四

藝文

卷之十五

藝文

卷之十六

藝文

卷之十七

藝文

卷之十八

雜誌

解州全志卷之八

本朝

人物

上古

風后海隅人

卽解之
鹽海

爲黃帝相帝王世紀黃帝夢大風

吹天下之塵垢皆去帝寤而歎曰風爲號令執政者

也垢去土后在也天下豈有姓風名后者哉於是依

占求之得風后於海隅登以爲相與力牧共政天地

治神明至帝因著占夢經十一卷藝文志風后兵法

十三篇圖三卷孤虛二十卷今風陵在風陵鄉以風

后塚名

蜀漢

關公諱羽字雲長本字長生好左氏春秋諷誦略皆上口遊涿郡昭烈合徒衆偕張飛爲之禦侮昭烈爲平原相以爲別部司馬與飛分統部曲三人寢則同牀恩若兄弟而稠人廣坐侍立終日周旋不避艱險昭烈襲殺徐州刺史車胄使公守下邳行太守事建安五年昭烈奔袁紹魏武拜爲偏將軍禮之甚厚紹遣將顏良攻東郡太守劉延於白馬魏武使爲先鋒擊之公望見良麾蓋策馬刺良於萬衆之中斬其首還紹諸將莫能當遂解白馬之圍表封漢壽亭侯初魏

武壯公爲人而察其心神無久留之意。令張遼問之。公歎曰：吾極知曹公待我厚，然吾受劉將軍厚恩，誓以共死，不可背之。吾終不留，吾要當立效以報曹公。乃去。遼以公言報魏武曰：事君不忘其本，天下之義士也。及公殺顏良，重加賞賜，公盡封其所賜，拜書告辭而奔昭烈於袁軍左右。欲追之，曹公曰：彼各爲其主，勿追也。從昭烈就劉表，表卒，荊州陷，昭烈自樊將南渡江，別遣公乘船數萬艘，會江陵。魏武追至當陽長坂，昭烈斜趣漢津，適與公船相值，共至夏口。魏武敗退，昭烈收江南諸郡，封拜元勳，以爲襄陽太守。邊

寇將軍駐江北昭烈西定益州拜董督荊州事公聞
馬超來降書問諸葛亮亮答曰孟起當與翼德並驅
爭先未及髯之絕倫逸羣也公美鬚髯故亮謂之公
省書大悅以示賓客公嘗流矢貫左臂後瘡雖愈陰
雨骨嘗疼痛醫曰矢鏃有毒入骨當破臂刮骨毒乃
除耳公便伸臂令醫劈之時公適請諸將飲食臂血
流離盈盤器而公割炙飲酒言笑自若二十四年昭
烈爲漢中王拜前將軍假節鉞是歲公率衆攻曹仁
於樊于禁助仁秋霖雨漢水溢禁所督七軍皆沒遂
降又斬龐德梁郄陸渾羣豪或遙受印號公威震華

夏魏武議徙許都以避其銳。司馬懿將濟請遣人勸孫權躡其後從之。先是權遣使爲子索公女。公辱罵其使不許婚。公圍樊。權遣助又淹遲罵曰。貉子敢爾。如使樊城拔吾不能滅汝耶。又南郡太守糜芳在江陵將軍傅士仁屯公安。素皆嫌公。輕已及供給軍資不悉相贍。公言還當治之。權陰誘芳仁。芳仁使人迎權。而魏武遣徐晃救曹仁。引軍退還。權已據江陵。公及子平胥遇害。追諡壯繆侯。

附考

漢景耀三年秋九月追諡故前將軍關某曰壯繆

侯程敏政爵諡考、關將軍仕漢封壽亭侯諡壯繆、而今之祠匾止題曰壽亭侯、不書諡意以漢爲國名、故不書以繆爲惡諡、故削之爲神諱也、考之史、漢壽本縣名、在犍爲、史稱費禕遇害於漢壽、唐人詩亦曰漢壽城邊野草春、又昭烈勸進表前列銜曰前將軍漢壽亭侯、關某若以漢爲國名、不當錯置於職名之下、至諡法武功不成曰繆、而繆穆古通用、若秦穆公、魯穆公、在孟子、漢穆生、晉穆彤、在史、皆爲穆、宋岳飛諡武穆、與此同意、古絳黃希聲曰、篁墩此論有見、但蜀有漢壽、屬梓潼郡、乃昭

烈入益州後所改葭萌之地今四川保寧府廣安縣也侯以建安五年在許受封何得預指此地乎東漢順帝陽嘉中改索陽縣爲漢壽在今常德府武陵縣北封時獨有此耳至昭烈勸進時侯遇害已二年若昭烈進漢中王羣下上天子表有曰盪寇將軍漢壽亭侯臣關某顧不引此何也張萱議諡布德執義曰穆中情見貌曰穆禮記大傳以序昭穆古本作繆左傳穆多作繆說文長箋諡法解名與實爽曰繆不作穆宋崇寧元年追封忠惠公大觀二年加封武安王李燾續通鑑長

編宣和五年正月己卯禮部奏關某勅封義勇武安王今以從祀武城王廟契勘從祀諸將例不得題諡號合稱蜀將武安王從之徽宗實錄曰武安王關某加義勇燾以爲禮部奏乃是去義勇實錄誤也建炎二年三月二十五日加封壯繆義勇

淳熙十四年十一月二十一日加封英濟

荆門志鄭南加

封記

同明洪武元年復稱壽亭侯

禮官不考遺漢字

嘉靖十

年稱漢將軍壽亭侯萬歷十八年加封協天護國忠義帝四十二年十月十日加封三界伏魔大帝神威遠震天尊關聖帝君天啟四年六月太常言

漢前將軍壽亭侯業已帝而祝文猶侯似不相蒙
有旨神號遵皇祖勅封

國朝順治元年勅封忠義神武關聖大帝乾隆二十
五年釐正諡法定用神勇二字洵萬世不易云

關平帝長子驍勇絕倫以忠義自許從父出入荆襄間
漢建安二十四年冬十二月呂蒙入寇死之

關興字安國帝少子有令聞丞相亮深器異之隨昭烈
在蜀帝歿興嗣漢壽亭侯爵弱冠爲侍中中監軍數
歲卒

關統侍中興子嗣封尙公主官至虎賁中郎將

角州全志 卷之八 五
關彞侍中興庶子以統卒無子嗣封成都失守死之

南北朝

柳元景馮翊太守憑子少便弓馬數隨父伐蠻以勇稱
寡言語有器質荊州刺史謝晦雍州刺史劉道產皆
重之累遷義恭城局叅軍孝武西鎮襄陽義恭薦元
景以爲武威將軍隨郡太守廣設方略斬獲羣蠻數
百郡境肅然元嘉二十七年八月北侵加建威將軍
總統軍師束馬懸車引軍上百丈崖出温谷度熊耳
山十一月至弘農令衆軍並造陝下列營以逼之魏
軍大潰面縛者二千餘人悉釋遣之諸軍並有功而

入元景再出北侵威信著於境外孝武入討元凶以爲諮議叅軍配萬人爲前鋒宗慤薛安都等十三軍皆隸焉至新亭依山建壘柵東西據險令軍中曰鼓繁氣易衰叫數力易竭但各銜枚疾戰一聽吾營鼓音及察賊衰竭乃命開壘鼓譟以奔之賊衆大潰劭更率餘衆自來攻壘復大破之劭僅以身免上至新亭以元景爲侍中領左衛將軍尋轉寧蠻校尉雍州刺史監雍梁南北秦四州荆之竟陵隨二郡諸軍事孝建元年正月左衛將軍王元謨討魯爽元景遣精兵助元謨以羸弱居守所遣軍多張旗幟梁山望之

如數萬人皆謂都下兵悉至由是尅捷臧質魯爽平
加開府儀同三司改封晉安郡公三年爲尙書令改
封巴東郡公六年進司空固讓開府授侍中驃騎大
將軍南兖州刺史留衛都下尋輔幼主遷尙書令領
丹陽尹加開府儀同三司給班劍二十人固辭元景
起自我行及當朝有弘雅之美不營產業南岸有數
十畝菜園園人得賣菜錢三萬送還怒曰我立園種
菜供家中啖耳乃復賣以取錢奪百姓利耶及宿衛
兵出稱詔召之元景整朝衣乘車應召弟車騎司馬
叔仁及左右壯士數千人欲拒命苦禁之下車受戮

容色恬然諸子姪死者數十人元景少子承宗嗣
子暮並在孕獲全明帝初贈太尉給班劍三十人羽
葆鼓吹一部諡曰忠烈祀鄉賢

柳世隆字彥緒元景弟子也世隆幼孤自立雖世胄獨
修布衣業長好讀書音吐溫潤元景愛賞之爲西陽
王撫軍法曹行參軍出爲武威將軍上庸太守上謂
元景曰卿昔以武威爲隨郡今復授世隆使卿門世
不乏公也後爲太子洗馬與張緒王延之沈琰爲君
子交累遷晉熙王安西司馬加寧朔將軍時齊武帝
爲長史與世隆甚懽武帝將下都高帝書曰汝旣入

朝當須文武兼資人委以後事世隆其人也武帝乃舉世隆自代轉武陵王前軍長史江夏內史行郢州事昇明元年冬沈攸之遣孫同劉攘兵王靈秀等分兵出夏口據魯山晝夜攻戰世隆隨宜拒應衆皆披却劉攘兵射書請降世隆開門納之攸之軍大散遣軍副劉僧麟緣道追之攸之已死徵爲侍中仍遷尙書右僕射封正陽縣侯出爲吳郡太守居母憂寒不衣絮褚淵嘗稱之曰世隆在危盡忠居憂杖而後起立人之本二理同極加榮贈寵足以敦厲風俗建元二年授右僕射不拜啟借秘閣書給二千卷三年出

爲南兗州刺史加都督武帝初加散騎常侍遷護軍
世隆性情廉介盛事墳典張緒問曰君當以清名遺
子孫耶答曰一身之外亦復何須子孫不才將爲爭
府如其才也不如一經光祿大夫韋祖征州里宿德
世隆每爲之拜人或勸祖征止之答曰司馬公爲後
生楷法吾豈能止之後授尙書左僕射以本官總督
伐蠻衆軍仍爲湘州刺史加都督至鎮以方畧討平
之後入爲尙書左僕射不拜轉尙書令世隆少立功
名晚專以談義自業不干世務垂簾鼓琴風韻清遠
世稱柳公雙鎖爲士品第一以疾遜位拜左光祿大

夫侍中永明九年卒給東園秘器贈司空班劍二十人諡曰忠武著龜經秘要二卷行世長子悅字文殊少有清致位中書郎早卒諡曰恭

柳慶遠字文和元景弟子也父叔珍義陽內史慶遠仕齊魏興太守郡暴水欲移杞城慶遠曰吾聞江河漲不過三日命築土而已俄水退百姓服之後爲襄陽令林憚薦之於梁武帝武帝曰文和吾已知之拜爲別駕慶遠謂所親曰定霸者其吾君乎盡忠協贊及起兵常居帷幄爲謀主從軍東下身先士卒武帝行營見慶遠頓舍嚴整每歎曰人人若是吾又何憂建

康平爲侍中帶淮陵齊昌二郡太守城內嘗夜火武帝歛諸門鑰悉付慶遠其見任如此霸府建爲從事中郎梁初封重安侯位散騎常侍改封雲杜出爲雍州刺史加都督上餞於新亭曰卿衣錦還鄉朕無西顧憂矣始武帝爲雍州慶遠爲別駕謂曰昔羊公語劉弘卿後當居吾處今相觀亦復如是曾未十年而慶遠督府談者以爲逾於魏詠之累遷侍中領軍將軍出爲雍州刺史慶遠重爲本州厲清節士庶懷之卒官贈開府儀同三司諡曰忠惠喪還上親出臨之其寵眷如此子津字元舉性強直歷散騎常侍太子

詹事襲雲杜侯太清三年卒

柳惔字文通世隆子好學工製文尤曉音律少與兄悅齊名王儉謂人曰柳氏二龍可謂一日千里儉嘗造世隆宅世隆謂爲詣已徘徊久之及至門爲求悅及惔遣語曰賢子俱有盛才一日相顧今故報禮若仍相造似非本意嘗預齊武烽火樓宴上善其詩曰惔非徒風韻清爽亦屬文道麗後爲巴東王子響友隨鎮荊州稱疾還獲免於累遷新安太守免建武末爲梁南秦二州刺史舉漢中以應梁武梁初爲太子詹事加散騎常侍先是武帝鎮襄陽惔祖道帝解茅土

玉環贈之天監二年元會上曰玉環新亭所贈耶對
曰旣而瑞感神衷臣謹服之無斃上因勸之酒惓未
卒爵上曰吾常比卿劉越石近辭卮酒耶罷會封曲
江縣侯上爲詩遺惓爾實冠羣后惟予實念功上嘗
謂朕放徐元瑜諸子何如惓曰罰不及嗣賞延於世
今復見之聖朝時以爲知言尋遷尙書左僕射年六
十卒於湘州刺史諡曰穆惓度寬博家人未嘗見其
喜愠著仁政傳及詩賦子昭中書郎襲曲江侯

柳惓字文暢世隆子少有志行好學善尺牘與陳郡謝
瀹友善齊竟陵王子良引爲法曹行參軍嘗置酒後

園有晉太傅謝安鳴琴在側援以授惲惲彈爲雅弄
子良曰卿巧越稽心妙臻牟體良質美手信在今夜
爲太子洗馬試守鄱陽除驃騎從事中郎梁武帝至
建業以爲征東府司馬上牋請先收圖籍及遵漢高
寬大之義從之徙相國右司馬天監元年除長兼侍
中與沈約共定新律惲性正素以貴公子早有令名
少工篇什爲詩云亭臯木葉下隴首秋雲飛瑯琊王
融見而嗟賞因書齋壁及白團扇武帝宴必詔賦詩
嘗和登景陽樓篇云太液滄波起長楊高樹秋翠華
承漢遠雕輦逐風游深見賞美當時咸共稱傳歷平

越中郎將廣州刺史秘書監在衛將軍府專奏
守爲政清靜人吏懷之惲善彈琴好醫術碁品在第二
上謂周捨曰吾聞君子不可求備至如柳惲可謂
具美分其才藝可了十人惲著十杖龜經少子偃字
彥游年十二梁武帝問讀何書對曰尙書又問有何
美句對曰德惟善政政在養民衆咸異之尙武帝女
長城公主拜駙馬都尉都亭侯位鄱陽內史卒子盼
尙陳文帝女富陽公主拜駙馬都尉後主初以帝舅
加散騎常侍劾免卒贈侍中中護軍后從祖弟莊清
警有鑒識深被恩禮位度支尙書入隋爲岐州司馬

柳愷字文深世隆子好元言通老易梁武至姑孰候接
小郊與諸人同憇逆旅食俱去行里餘命左右燒逆
旅舍以絕後追當時服其善斷歷給事黃門侍郎與
瑯琊王峻齊名俱爲中庶子時人號爲方玉後爲鎮
北始興王長史移鎮益州復請愷上曰柳愷才氣恐
不能爲少王臣王堅請爲鎮西長蜀郡太守涖政廉
恪益部懷之

柳忱字文若世隆子年數歲父及母閻氏並疾忱不解
帶者經年及居喪以毀聞仕齊西中郎主簿勸長史
蕭穎胄同武帝爲寧朔將軍累遷侍中郢州平穎胄

議遷都夏口枕以巴峽未賓不宜輕舍根本動搖人心俄而巴東兵至峽口遷都議乃息論者以爲見機梁初封州陵伯歷五兵尚書秘書監散騎常侍改給事中光祿大夫卒諡穆忱與兄惔惓惓三兩年間四人迭爲侍中復居方伯當世罕比子範嗣

柳敬禮津子少以勇力聞而性麤暴嘗與兄仲禮謀殺侯景不果及景攻晉熙敬禮與南康王謀襲其城剋期將發建安侯蕭賁告之遂遇害

柳遐字子昇父季遠梁宜都太守遐幼而爽邁神彩嶷然髫歲便有人量篤好文學動合規矩世父慶遠

特器之仕梁尙書功論郎謝舉嘗稱之曰江漢英靈
見於此矣岳陽王蕭嘏承制授吏部郎賜爵聞喜公
尋進持節侍中驃騎大將軍開府儀同三司及嘏踐
位於江陵以襄陽歸周辭嘏曰陛下中興鼎業龍飛
舊楚臣昔因幸會早奉名節理當以身許國期之始
終自晉氏南遷臣宗族蓋寡從祖太尉世父儀同從
父司空並以位望隆重遂家金陵惟畱先臣獨守墳
栢嘗戒臣等使不違此志今襄陽旣入北朝臣若陪
隨鑾蹕進則無益塵露退則有虧先旨嘏重違其志
遂許之因畱鄉里以經藉自娛周時頻徵固辭以疾

及警卒舉哀行舊臣之服保定中又徵之始入朝授
驃騎大將軍開府儀同三司霍州刺史導人務先以
德不用命者乃微加貶其下感而化之曰我君仁惠
其可欺乎卒贈金安二州刺史初還爲主簿奔父喪
哀感行路中流風起抱棺號慟風止浪息北史贊柳
遐立身之道進退有節觀其眷戀墳隴其孝可移於
朝廷盡禮舊主其忠可事於新君夫能推此以求賢
則知人幾於易矣祀鄉賢

柳崇字僧生七世祖軌晉廷尉卿崇方雅有器量身長
八尺美鬚明目兼有學行舉秀才射策高第爲本郡

邑中正事詳宦績累遷河中太守卒於官贈岐州刺史諡穆祀鄉賢崇文章寇亂遺失長子慶和性沉靜不競於時位給事中慶和弟楷字上則身長八尺善草書頗涉文史位撫軍司馬

柳元章崇之從父弟姿貌魁偉歷叅軍長史元熙起兵欲除元義元章與魏太守李孝怡執熙賜爵猗氏伯除正平太守

裴俠字嵩和祖思齊舉秀才父欣西河郡守俠幼而聰慧州舉秀才從孝武入關王思政鎮玉壁以俠爲長史未幾爲齊神武所攻神武以書招思政思政令俠

草報詞甚壯烈周文嘉之曰雖魯連無以加也除河
北郡守功績尤著周武成元年卒祀鄉賢

柳蚪字仲盤年十三卽專精好學徧受五經兼涉子史
雅好屬文孝昌中揚州刺史李憲舉秀才兗州刺史
馮雋引爲府主簿揚州刺史樊義又以爲揚州從事
加鎮遠將軍棄官還洛陽大統三年馮翊王元季海
領軍獨孤信鎮洛陽時舊京人物惟蚪在陽城裴諏
在潁川信等俱徵之以蚪爲行臺郎中諏爲北府屬
並掌文翰蚪勵精從事通夜不寢季海嘗云柳郎中
辦事我不復重看四年入朝爲獨孤信開府從事中

郎信出鎮秦隴爲二府司馬不綜府事惟在左右談
論而已因使見周文畱爲丞相府記室封美陽縣男
請史官記事者當朝顯言其狀庶令是非得失無隱
事遂施行時人論古今文體之異蚪謂時有古今文
無古今作文質論十四年除秘書丞遷中書侍郎終
起居注廢帝初遷秘書監加車騎大將軍儀同三司
蚪嘗敝衣蔬食曰衣不過適體食不過充飢孜孜營
求徒勞思慮耳恭帝元年卒年五十四贈兗州刺史
諡曰孝祀鄉賢子鴻漸嗣

柳元達涉獵經史仕齊諸王叅軍與裴叔業姻婭叔業

獻欵元達贊成其計入魏除司徒諮議叅軍封南頓
縣子卒改封夏陽子絳襲絳弟遠字季雲好彈琴耽
酒時有文詠每出行返家人或問消息答云無所聞
縱聞亦不解後客遊卒元達弟元瑜位陰平太守子
諧有文學善鼓琴以新聲手勢京師士子翕然從學
除著作佐郎於河陰遇害

裴佗字元化仕後魏魁偉有器望少治周易毛詩杜氏
春秋舉秀才高第除中書博士累遷趙郡太守爲政
有方常以祿濟貧轉東荊州刺史趙人闔境攀送至
荆慰降蠻酋萬餘遷中軍以老乞還卒佗性正儉居

宅不過二十步無田園暑不張蓋寒不衣裘其諸子讓之誨之讞之謀之訥之謁之皆遵遺範爲時聞人按裴氏共有五支其居解梁洗馬川者號洗馬裴爲蘭陵武公文秀之後因自涼還解又號西眷裴其中眷爲晉太尉天明之後東眷則輯之後俱散處安邑聞喜間又有南來吳裴則南兗州刺史叔業之後佗則州裴之祖

關朗字子明有經濟大器妙極占算浮沉鄉里不求宦達魏太和末王蚪署朗爲記室蚪與談易歎曰足下奇才也言於孝文詔見問老易朗寄發元宗實陳王

道諷帝慈儉爲本飾之以政刑禮樂帝嘉歎謂蚪曰
先生知人矣昨見子明管樂之器旣而頻日引見會
帝有烏丸之役勅子明隨蚪出鎮并州軍國大議馳
驛而問朗終不仕子彥師事朗受春秋及易共隱臨
汾山祀鄉賢

王春少精易占明陰陽風角齊神武帝引爲館客韓陵
之戰四面受敵從寅至午三合三離將士皆懼神武
欲退春叩馬諫曰至未當大勝縛其子詣軍門不勝
請斬之已而戰果捷後從征討占事多中位東徐州
刺史封安邑縣公卒贈秦州刺史

裴讓之字士禮。佗子。年十六喪父。殆不勝哀。其母辛氏泣撫之曰。棄我滅性。得爲孝乎。由是自勉好學。能詩。文舉秀才。對策高第。武定累遷屯田郎中。

裴訥之。佗五子。純謹有局量。爲北齊平原開府掌書記。從至井州。日思其母。心驚動。請急還。母方病。心痛人咸以爲孝感。

裴謁之。字士敬。佗第六子。少有志節。好直言。文宣末。上書正諫。言甚切直。白刃臨頸。辭色不變。文宣曰。癡漢何敢如此。楊愔曰。望取後世名耳。文宣投刀歎曰。我終不成爾名。遣人送出齊。亡卒於壺關令。

裴諏之字士正釋褐爲太學博士嘗從常景借書百卷閱十許日便還後應問無遺景歎曰應奉五行俱下彌衡一覽便記今復見於裴生矣因楊愔闔門改葬頓作十餘墓誌皆佳時有諏之勝讓之之語周文帝時爲大行臺倉曹郎中

裴矩字宏大訥之子好學有智數仕齊高平王文學入周爲隋文記室隋初遷給事郎伐陳領元帥記室令與高潁收陳圖籍明年詔巡撫嶺南時俚帥遣將逼廣州矩擊斬之綏輯二十餘州還拜開府賜爵聞喜縣公大業初令掌張掖交市事撰西域圖記三卷入

角州全志 卷之八
朝奏之後遷黃門侍郎復令往張掖引致西番凡數十國皆朝貢又以度遼功進位光祿大夫後歸唐授左庶子轉詹事戶部尙書著書最富

柳檜字季華蚪弟性剛果任氣少文善騎射年十八起家奉朝請居父喪毀瘠骨立服闋除陽城郡丞防城都督大統四年從戰河橋先登授都督鎮鄯州八年拜湟河郡守仍典軍事尋加平東將軍大中大夫吐谷渾入寇檜兵少撫而勉之衆心乃安因率數十人先擊餘衆乘之渾大敗走封萬年縣子時吐谷渾數侵疆場檜屢戰屢破之數年不敢爲寇十四年遷河

州別駕轉帥都督俄拜使持節撫軍將軍大都督居
三載徵還時檜兄蚪爲秘書丞弟慶爲尙書左丞檜
曰兄則職典簡牘褒貶人倫弟則管轄羣司股肱朝
廷可謂榮寵矣然而四方未靜車書不一檜惟當蒙
矢石履危難以報國恩耳頃之周文謂檜曰九曲國
之東鄙勞君守之遂鎮九曲尋從王雄討上津魏興
平之除魏興華陽二郡守安康人黃衆寶將圍州城
先圍檜郡郡城卑下士衆寡弱又無守禦之備連戰
十餘日士卒僅存城陷身被十餘創遂爲賊所獲旣
而衆寶進圍東梁州縛檜置城下欲令誘城檜大呼

曰羣賊烏合糧食已罄行卽退散各宜勉之衆寶臨
檜以兵曰速更汝辭不爾便就戮檜守節不變遂害
之棄屍水中城中人皆爲流涕贈東梁州刺史

柳鶯檜弟好學善作文卒於魏臨淮王記室叅軍事子
帶韋字孝孫少好學深沉有度身長八尺三寸美風
儀善占對周文辟叅軍事令使梁還授輔國將軍中
散大夫後爲行臺左丞廢帝元年出爲解縣令事詳
宦績周天和二年封康城縣男齊平進爵公陳王純
鎮并州以爲總管府長史卒官子祚嗣少有名譽位
宣納上士入隋爲司勳侍郎

柳慶字更興，鸞弟，幼聰敏，有器量，博涉羣書，不爲章句。嘗爲父僧習作書草，僧習歎曰：「此兒有意氣，丈夫理當如此。」慶出後，第四叔及父喪，議者不許重服，慶泣曰：「禮緣人情，若於出後之家，更有苴斬之服，可奪此以從彼。今四叔薨，背已久，情事不追，豈容奪禮，遂以苫由終喪，負土成墳。」孝武將西遷，慶以散騎侍郎馳傳入關，至高平，見周文，共論時事。周文請迎輿，駕令慶復命。帝欲往荊州，慶曰：「關中金城千里，天下之彊國也。荊州地無要害，寧足以固鴻基。帝納之，及西遷，以母老不從，獨孤信鎮洛陽，乃得入關，除相府東閣。」

祭酒大統十年除尙書都兵郎中并領記室時北雍州獻白鹿慶爲表操筆立成辭兼文質尋領雍州別駕笞殺豪強屢決疑獄每歎曰昔于公斷獄無私闢高門以待封吾其庶幾乎封清河縣男尋進爵爲子慶威儀端肅樞機明辨周文每發號令常使宣之天性亢直無所回避周孝閔帝賜姓宇文氏進爵平齊縣公兄子雄亮刃讎人黃衆寶晉公護讓慶擅殺人對曰慶聞父母之讎不同天昆弟之讎不同國明公以孝臨天下何責於此乎護逾怒慶辭色無屈竟免卒贈鄜綏丹三州刺史諡曰景子機嗣

柳宏字匡道少聰穎工草隸博涉羣書辭采雅贍與弘
農楊素爲莫逆交解巾中外府記室建德初除內史
上士歷小官尹御正上士陳遣王偃人來聘令宏勞
之偃人至藍田滋水暴長所齎國信胥溺假從吏物
進之宏曰昔淳于獻空籠前史稱美足下假物而進
詎是陳君命乎偃人慚不能對武帝嘉之盡以所進
物賜宏仍令報聘占對敏捷見稱於時後卒於御正
下大夫贈晉州刺史楊素誄曰山陽王弼風流長逝
潁川荀燦零落無時修竹夾池永絕梁園之賦長楊
映沼無復洛川之文其爲士友痛惜如此有文集行

世

隋

柳機字匡時慶之子也偉容儀有器局頗涉經史年十九周武帝時爲魯公引爲記室及帝嗣位累遷太子宮尹封平齊縣公宣帝時爲御正上大夫屢諫不聽求出拜華州刺史隋初進爵建安郡公徵爲納言機性寬簡有雅望好飲酒不親細務尋轉冀州刺史後徵入朝以其子述尙主禮遇益隆卒贈大將軍青州刺史諡簡祀鄉賢子述嗣

柳詵字顧言惲之子僑居襄陽晉少聰敏解屬文讀書

萬卷仕梁著作佐郎。後爲蕭譽侍中，領國子祭酒吏部尚書。梁國廢，拜開府爲內史侍郎。轉晉王諮議叅軍。王招引才學士，晉爲之冠。以師友處之，文什必令潤色。甚見親重。仁壽初，引爲東宮學士。有所顧問，應答如響。太子以其好內典，令撰法華元宗二十卷。上之，賞賜優洽。大業中，拜秘書監，封漢南縣公。上退朝後，便命入閣言宴，諷讀終日而罷。或與同榻共席，恩比朋友。猶恨不能夜召，乃命刻木偶人，肖晉月下對飲，輒令宮人置於座，與相酬酢，以爲歡笑。從幸揚州，卒。傷惜久之，贈大將軍諡康。

柳靖字思休、遐子、少方雅博覽、墳籍仕梁正員郎、入周授大都督、歷河南德廣二郡守、有政術、吏人畏愛之、然性愛閑、素於名利淡如也、及秩滿還鄉、便有終焉之志、隋文帝特召徵之、以疾固辭、閉門自守、足不歷園庭、殆將十載、子弟奉若嚴君、其有過者、靖必下帷自責、長幼相率拜謝、然後見之、勗以禮法、鄉里亦慕而化之、或有不善者、皆曰、惟恐柳德廣知也、時論方之王烈、前後總管到官、皆親問疾、遂以爲故事、秦王俊臨州賚以几杖、并致衣物、靖惟受几杖、餘并固辭、其爲當時所重如此、開皇中卒、

柳雄亮字信誠檜子檜見害雄亮年十四哀毀過禮陰有復讎之志武帝時衆寶率其部歸長安帝待之甚厚雄亮手斬衆寶於城中請罪帝特原之後累遷內史中大夫賜爵汝陽縣子隋初拜尙書考功侍郎遷給事黃門侍郎尙書省奏事多所駁正俄檢校太子左庶子進爵伯出爲秦州總管府司馬領山南道行臺左丞卒子贊嗣

柳敏字白澤少孤以孝聞周文克復河東見而器之曰今日不喜得河東喜得卿也拜丞相府叅軍事轉戶

曹參兼記室與蘇綽等修撰新制遷禮部郎中封

武城縣子益州平進驃騎大將軍開府儀同三司加
侍中遷尙書賜姓宇文氏周初進爵公又除河東郡
守又爲郢州刺史甚得物情及將還朝夷夏士人並
齎酒餼物產候於路敏從他道還復拜禮部武帝平
齊進武德郡公武帝及宣帝並親幸其第問疾開皇
元年進上大將軍太子太保卒贈五州諸軍事晉州
刺史

柳莊字思敬遐子少有器量博覽墳籍兼善詞令濟陽
蔡大寶有重名見莊歎曰襄陽水鏡復在於茲遂以
女妻之仕梁爲鴻臚卿入隋爲開府儀同三司除黃

門侍郎莊明習舊章雅達政事凡所駁正帝莫不稱善蘇威重莊器識常奏云江南人有學業者多不習世務習世務者又無學業能兼之者不過柳莊後以行軍總管長史隨軍討平徐璿授饒州刺史甚有能名卒於官

柳旦宏弟字匡德工騎射頗涉書籍仕周兵部下大夫以討王謙有功授儀同三司隋開皇元年加開府封新城縣男歷羅浙魯三州刺史並有能名大業初拜龍川太守開設學校大變郡風詔褒美之徵爲太常少卿攝判黃門侍郎事卒子熒河內郡掾

解州全志 卷之八
柳肅旦弟字匡仁少聰敏嫻於占對仕周位宣納上士
開皇初授太子洗馬歷太子內舍人太子廢坐除名
大業中詔守禮部侍郎後守工部侍郎卒官

柳謩之字公正風神爽亮音韻清雅以明經擢第仕周
爲宣納上士開皇初歷兵部司勳二曹侍郎遷光祿
少卿出爲肅息二州刺史俱有惠政大業初拜黃門
侍郎爲齊王長史坐除名後召檢校燕郡事坐供頓
不給戍嶺南卒

柳昂字千里敏子周武帝時爲內史中大夫開府儀同
三司賜爵文城郡公竭誠獻替知無不爲謙挹未嘗

驕物時論重之周末拜太宗伯隋加上開府拜潞州
刺史有惠政表清勸學行禮自是天下州縣皆置博
士卒官

柳裘字茂和在梁歷位尙書郎駙馬都尉周明武間自
麟趾學士累遷太子侍讀封昌樂縣侯除天官府都
上士宣帝初拜儀同三司進爵公轉御飾大夫隋初
以定策進上開府內史大夫開皇元年進大將軍拜
許州刺史在官清簡吏民懷之轉曹州刺史其後上
思裘功欲加榮秩顧朝臣曰曹州刺史何當入朝或
曰卽今冬也裘尋卒爲傷惜者久之諡安子惠童嗣

柳儉字道約仕周歷宣納上士畿伯大夫隋初擢水部
侍郎封率道縣伯出爲廣漢太守尋拜蓬州刺史遷
邛州刺史大業初授朝散大夫拜宏化太守五年入
朝郡國畢集上謂納言蘇威尙書牛宏曰其中清名
天下第一者爲誰威等以儉對賜儉帛二百匹令天
下朝集使送至郡邸以旌異焉恭帝立歸京拜上大
將軍歲餘卒年八十九

柳彧字幼文少好學涉經史周大象宰宇文護引爲中
外府記室久而出爲寧州總管掾詣闕求試武帝異
之隋初累遷尙書虞部侍郎高潁子宏德封應國公

申牒請列門戟或判曰僕射之子更不異居父之戟
槩已列門外尊有壓卑之義子有避父之理豈容外
門旣設內閣又施頰聞而歎服後遷書侍御史當朝
正色百寮敬憚以忤旨免尋復令視事因謂或曰無
改爾心以其家貧勅有司爲築宅且曰柳或正直士
國之寶也其見重如此右僕射楊素嘗以少遣勅送
南臺素恃貴坐或牀或從外來至階下端笏整容曰
奉勅治公罪素遽下或據案而坐立素於庭辨詰事
狀素銜之是歲持節巡省河北五十二州奏免長吏
贓污不稱職者二百餘人州縣肅然莫不震懼拜儀

同三司歲餘加員外散騎常侍治書如故仁壽初復持節巡省太原道十九州後爲楊素搆除名配戍懷遠鎮徵還至晉陽爲漢王諒使所逼召入城而諒反形已露或度不得免遂詐中惡不食自稱危篤諒怒囚之坐徙燉煌後徵還卒於道

柳述字業隆機子性明敏有幹略頗涉文藝蔭太子親衛尙蘭陵公主拜開府儀同三司內史侍郎上於諸壻中特見寵遇歲餘判兵部尙書事父艱尋起攝給事黃門侍郎襲建安郡公仁壽中判吏部尙書事每陵侮楊素素銜之文帝寢疾令述召房陵王素與皇

太子謀矯詔執述煬帝立除名謫龍川徙寧越瘴卒
柳調昂子歷秘書郎侍御史左僕射楊素嘗於朝堂見
調獨言曰柳條通體弱獨搖不須風調歛版正色曰
調信無取公不當以爲侍御信有可取不應發此言
公當具瞻之地樞機不可妄發素甚奇之大業中累
遷尙書左司郎中清素守常爲時所美

姚暹大業中爲都水監事詳宦績

唐

柳亨字嘉禮隋大業末爲王屋長姿貌魁異高祖以外
孫竇妻之三遷左衛中郎將壽陵縣男貶邛州刺史

進散騎常侍代還太宗幸南山召見哀之拜光祿少卿亨謝賓客身安靜素力吏事終檢校岐州刺史贈禮部尚書幽州都督諡曰恭

張元素虞鄉人

州在隋時爲虞鄉

仕隋爲景城縣戶曹竇建德

陷景城被執將殺之邑人千餘號泣請代曰此清吏殺之是無天也大王卽定天下無使善人解體建德命釋縛署治書侍御史不拜聞江都已弒始爲建德黃門侍郎賊平授景州錄事叅軍太宗卽位問以政善之拜侍御史遷給事中正觀四年詔發卒治洛陽宮乾陽殿且東幸元素上書諫止之且曰臣恐陛下

之過甚於煬帝、帝嘉曰、卿謂我不如煬帝、何如桀紂、對曰、若此殿卒興、同歸於亂、臣聞東都始平、太上皇詔宮室過度者焚之、陛下謂瓦木可用、請賜貧人事、雖不從、天下稱爲盛德、今復度而宮之、是隋役又興、不五六年間、一捨一取、天下謂何帝、顧房元齡曰、洛陽朝貢天下之中、朕營之意、欲便四方百姓、今元素言如此、使後必往、雖露坐庸、何苦、卽詔罷役、賜綵二百匹、魏徵名梗挺、聞元素言、歎曰、張公論事、有回天之力、可謂仁人之言哉、歷太子右庶子、又極諫太子承乾不德事、不聽、高宗時、以老致仕、麟德初卒。

柳範正觀中爲侍御史時吳王恪好田獵範彈治之太宗曰權萬紀不能輔導恪罪當死範進曰房元齡事陛下猶不能諫止畋獵豈獨罪萬紀上拂衣起召謂曰何廷折我範謝曰主聖則臣直陛下仁聖臣敢不盡愚乃解高宗時歷尙書右丞揚州大都督府長史羅道琮字允之虞鄉人勤於學業慷慨有節義正觀末上書忤旨配流嶺表時有同被流者病死荆襄曾囑負骨歸里及赦還屬霖潦不得殯所道琮設祭慟哭水忽沸涌又祝之再沸得其處銘誌可驗遂負之還鄉後以明經登第高宗末官至太學博士

衛大經三樓里人卓然高行口無二言武后召之固辭
疾素善魏夏侯乾童聞其母卒盛暑步往弔或止之
曰不如致書答曰書能盡意耶比至乾童以事行乃
設席行弔禮不詢其家而還開元初畢構爲刺史使
縣令孔慎言就謁辭不允大經遂於人謂易聖豫
筮死日鑿墓自爲志如言終祀鄉賢

柳芳爽之族子開元末進士由永寧衛直史館肅宗時
與常述撰緝吳兢所次國史又倣編年法爲唐歷四
十篇時稱其得史體改集賢學士子冕字敬叔博學
富文詞與父並居集賢院以議論勁切忤執政出爲

刺史轉觀察使

張琇父審素以儁州都督被誣爲御史楊汪所誅琇徙嶺南久之逃還殺汪於都城繫表於斧以訴父寃吏捕以聞張九齡欲活之明皇謂孝子不顧命殺之可成其志臨刑色自如曰下見先人夫復何恨

柳澤亨曾孫耿介少言笑風度端嚴景雲中爲右率府鎧曹叅軍上疏諫太平公主與胡僧慧範以此誤陛下故語曰姚宋爲相邪不如正太平用事正不如邪又言尙醫奉御彭君慶以巫覡小伎超授三品輕用名器不報開元中轉殿中侍御史監嶺南選時市船

使周慶立造奇器以進澤上書曰不見可欲使心不亂是知見可欲而心必亂矣慶立雕製詭物造作奇器用浮巧爲珍玩以譎怪爲異寶乃治國之巨蠹明主所宜嚴罰者也元宗稱善歷遷太子右庶子爲鄭州刺史未行卒贈兵部侍郎祀鄉賢

關播字務元聖裔自解遷汲進士及第德宗初遷右補闕出爲河南參軍湖南賊帥王國良阻山爲盜播以都官員外郎遣往招撫陛辭上問爲政之要對曰爲政之本必求有道賢人與之爲理上曰朕已下詔求賢又遣使搜訪矣對曰此惟得文辭干進之土耳其安

角州全志
卷之八
得有道賢人肯隨牒舉選乎上悅終兵部尙書以太
子少師致仕

胡謚字啟中元和初進士未顯時脫裴度於酒肆中人
謂之俠歷官諫議大夫嘗爲和親使党項犯邊謚以
儒而有勇除鎮武軍節度使建節赴鎮鄉人榮之韓
愈有贈胡十二丈詩又使漢南脅屈不從還拜工部
侍郎今州西胡村胡姓其裔孫也

柳識字方明渾兄知名士也工文章與蕭穎士元德秀
劉迅相上下而識練理創端往往詣極當時作者服
其簡拔

柳中庸名淡以字行御史開弟與弟中行皆有文名蕭
穎士以女妻之仕爲洪府戶曹

柳渾字夷曠一字惟深本名載早孤十餘歲時有巫曰
兒相天且賤爲浮屠可緩死渾曰去聖教爲異術不
若速死學愈篤天寶初以襄州籍擢進士第調單父
尉累除衢州司馬棄官隱寧武山召拜監察御史求
外職宰相惜其才晉左補闕俄爲袁州刺史又爲諫
議大夫浙江東西黜陟使入爲尙書右丞朱泚亂渾
匿終南山賊以宰相召執其子榜笞之搜索所在渾
羸服步至奉天改右散騎常侍更今名三年同中書

門下平章事仍判門下省上嘗親擇吏宰畿邑政有
狀宰相皆賀渾獨不賀曰此特京兆職耳陛下當擇
臣輩以輔聖德臣當選京兆尹承大化尹當求令長
代尹擇令非所宜上然之渾瑊與吐蕃會平涼上語
大臣以和戎息師之便渾跪白曰夷狄易以兵制難
以信結臣竊憂之上變色曰渾儒生未達邊事夜半
邠寧飛奏吐蕃劫盟上卽以其表示渾明日慰之曰
卿儒士乃知軍戎萬里情乎益禮異之宰相張延賞
遣親厚謂曰明公舊德第慎言於朝則位可久渾曰
爲我謝張公渾頭可斷舌不可禁卒爲所擠罷政事

五年卒年七十五諡曰正祀鄉賢

柳子華公綽諸父也始辟嚴武劍南府累遷池州刺史
代宗命葺華清宮以子華爲修宮使設棘圍於市徇
邑中得華清宮瓦石材用投圍中踰三日不還者死
不終日已山積矣營辦略足宰相元載奴縱暴子華
杖殺之一邑震服預知其終自爲墓銘子公器公度
公度善攝生年八十餘有強力嘗曰吾初無術但未
嘗以氣海煖冷物熟生物不以元氣佐喜怒耳位貴
祿少卿公器生遵遵生燦

柳晟六世祖敏後周太子太保父潭尚和政公生啓太

僕卿晟年十二父喪以孝聞代宗養宮中使受學於
吳大瓘既長拜檢校太常卿德宗時從幸奉天自請
說賊上壯其志遣之泚將郭常張光晟皆晟雅故晟
出密詔陳禍福逆順常奉詔謀泄泚捕繫之晟夜半
踰垣毀械而亡斷髮爲浮屠間歸奉天上爲流涕擢
元王府長史累遷將作少監封河東縣子授山南西
道節度使晉甯公卒年六十九詔從官臨弔贈太子
少保祀鄉賢

柳公綽字寬如生三日伯父子華曰興吾門者此兒也
因小字起之幼孝友性質嚴重起居皆有禮法屬文

典正不讀非聖書舉賢良方正直言極諫補校書郎
間一年再登其科授渭南尉歲歉每飯不過一器歲
豐乃復或問之答曰四方飢病獨能飽乎累遷開州
刺史復遷侍御史吏部員外郎憲宗喜功且數出遊
畋奏太醫箴以諷上高其才踰月拜御史中丞出爲
湖南觀察使時方討蔡公綽引兵渡江抵安州授李
聽爲都知兵馬使中軍先鋒行營都虞侯戒諸校曰
行營事一決都將聽遂盡力當時服其知權軍出公
綽數省問其家疾病生死厚給之婦人敖蕩者沉之
江軍中感服曰中丞爲我知家事敢不死戰故鄂軍

每戰輒克元和十一年除給事中宣諭鄆軍州復命拜京兆尹方赴府神策校乘馬不避卽時榜死上怒其專殺公綽曰此非獨試臣乃輕陛下法上曰旣死不聞可乎公綽曰臣不當奏在市死職金吾在防死職左右巡使乃解母服除爲刑部侍郎領鹽鐵轉運使轉兵部兼御史大夫長慶元年復爲京兆尹時幽鎮用兵使驛繫道上言比館遞匱乏驛置多闕勅使衣緋紫者所乘至三四十騎黃緣者不下十數吏不得視券隨口輒供驛馬盡乃掠奪民馬怨絕驚擾行李殆絕請著定限以息其弊詔條檢其數宦官嫉之

改吏部侍郎遷御史大夫召百官問韓弘疾弘遣子
辭不能見公綽謂曰百官省候是謂異禮宜力疾見
公卿弘扶杖以出改禮部尙書以祖諱換左丞俄檢
校戶部尙書山南東道節度使行部至鄧縣吏有納
賄舞文二人同繫獄縣令謂必殺貪者公綽判曰賊
吏犯法法存姦吏壞法法亡誅舞文者寶歷元年就
遷檢校左僕射牛僧孺爲武昌節度使具軍容赴謁
左右諫答曰奇章始去台宰方鎮重宰相所以尊朝
廷也入爲刑部尙書俄拜邠寧節度使復爲刑部尙
書以病乞代授兵部尙書忽顧左右召故吏韋長曰

爲我白宰相徐州專殺李聽親吏非用高瑀不能安
因瞑目不復語後二日卒贈太子太保諡曰元公綽
嘗居喪毀墓三年不澡沐事後母薛謹甚外兄薛官
早卒爲育其女嫁之嘗曰吾蒞官未嘗以私喜怒加
人子孫其昌乎善取士多知名貴顯云

柳公權字誠懸公綽弟也年十二工辭賦元和初擢進
士第李聽鎮夏州表掌書記入奏拜右拾遺侍書學
士再遷司封員外郎上問用筆法對曰心正則筆正
筆正乃可法矣上改容悟其以筆諫也改右司郎中
宏文館學士文宗復召侍書遷中書舍人充翰林書

詔學士從幸未央承詔賦詩應聲成文書法勁媚自
爲一家當時大臣家碑誌非其筆人以子孫爲不孝
外國入貢日皆別署貨貝曰此購柳書者又嘗與太
學士對便殿上稱漢文帝恭儉因舉袂曰此三澣衣
學士皆賀獨公權無言上問之對曰人主當進賢退
不肖納諫諍明賞罰服澣濯之衣此小節耳非有益
治道者異日周墀同對論事不阿墀爲惴恐公權益
不奪上徐曰卿有諍臣風可屈居諫議大夫乃自舍
人下遷仍爲學士知制誥開成三年轉工部侍郎召
問得失因言郭旼領邠寧而議者頗有臧否上疑之

角州全志 卷之八 詩
答曰收誠勲舊然人謂獻二女乃有是除信乎上曰
女自叅承太后耳公權曰疑嫌間不可戶曉因引王
珪諫廬江王妃事是日命送二女還家其忠蓋多類
此遷學士承旨武宗立罷爲右散騎常侍宰相崔瑛
引爲集賢院學士李德裕不悅左授太子詹事改賓
客累封河東郡公復爲常侍進太子少師咸通初以
太子太保致仕卒年八十八贈太子太師公權博貫
經術通音律而不喜奏樂曰聞之令人驕怠公綽嘗
曰家弟本志儒學蓋非止以工書名也嘗貯盃盃一
筒緘識如故而器皆亡奴妄言叵測公權笑曰銀杯

羽化矣不復詰惟硯筆圖籍自鑄秘之

柳仲郢字諭蒙公綽子工文著尙書二十四司箴爲韓
愈咨賞元和末進士第爲校書郎入爲監察御史遷
侍御史禁卒誣里人斫墓栢射殺之中尉護免其死
仲郢監罰執曰賊不死是亂典型遂獨召京兆杖之
朝廷嘉其守會昌初累轉吏部郎中遷左諫議大夫
武宗築望仙臺累諫諄切拜京兆尹置權量於東西
市使貿易用之禁私製者北司吏入粟違約殺而尸
之自是無人敢犯宣宗初出爲鄭州刺史復出爲河
南尹以寬惠爲政或言不類京兆時答曰輦轂之下

先彈壓郡邑之治本惠養烏可類乎擢劍南東川節
度使居五年召爲吏部侍郎俄改兵部領鹽鐵轉運
使大中十二年辭疾以刑部尙書罷使轉戶部封河
東縣男爲山南西道節度使貶雷州刺史尋以太子
賓客分司東都起爲虢州刺史以檢校尙書左僕射
東都畱守咸通五年爲天平節度使卒於鎮仲郢方
嚴尙義氣事親甚謹每私居內齋束帶正色服用簡
素在官不奏祥瑞不度僧道急於摘貪吏濟單弱每
旱潦必貸匱蠲負里無逋家衣冠孤女不能自歸者
斥廩爲婚嫁藏書萬卷手抄六經它書凡三十篇號

柳氏自備皆楷小精真無行字子三珪璧玼秀整而
文珪以進士授藍田尉直宏文館遷右拾遺終衛尉
少卿璧以翰林學士累遷右諫議大夫玼以明經補
秘書正字由書判拔萃累轉左補闕高湜再鎮昭義
皆表爲副擢刑部員外郎湜貶三疏申理湜後得稿
嗟歎以爲其言雖自辨不如也出爲嶺南節度副使
解中橋熟旣食乃納直於官文德元年以吏部侍郎
修國史拜御史大夫直清有父風昭宗欲倚以爲相
中官譖玼煩碎非廊廟器乃止坐事貶瀘州刺史卒
光化初復官爵柳氏世閱玼常述家訓以戒子孫焉

解州全志卷之九 本州

人物

宋

柳開字仲塗僑大名父承翰乾德初監察御史開幼穎異有膽勇周時侍父任南樂盜夜入室開纔十三亟取劍逐之盜踰垣出開揮刃斷二足指既就學喜討論經義五代文格淺弱慕韓愈柳宗元爲文因名肖愈字紹元旣而改名字以爲能開聖道之塗也著書自號東郊野夫又號補亡先生作二傳以見意尙氣自任不欲小節所交皆一時豪雋開寶六年舉進士

補宋州司寇兼軍以治獄職遷錄事歷知常州
州貝州加殿中侍御史雍熙二年坐與監軍忿爭貶
上蔡令會北征開部送軍糧將至涿州遼帥領萬騎
與米信相持俄給言求降開謂信曰兵法云無約請
和謀也彼將有謀急攻之必勝信遲疑不決後偵之
果以矢盡俟取於幽州也雍熙中使河北因抗疏曰
臣受非常恩未有以報年纔四十膽力方壯願陛下
賜臣步騎數千任以河北用兵之地必能出生入死
爲陛下復幽薊雖身歿戰場臣之願也乃以開爲崇
儀使知寧邊軍徙全州全西延洞粟氏聚族五百餘

常抄劫開爲作衣帶巾帽選才吏勇辨者三輩使入
諭之粟氏率其酋四人與吏偕來開厚犒賜居數日
遣還如期攜老幼悉至開卽部其居業作時鑑一篇
刻石戒之遣酋入朝授東州上佐賜開錢三十萬淳
化初移知桂州復知環州三年移邠州時調民輦運
趣環慶民皆蕩析產業復督民運開貽書轉運使曰
開近離環州知芻糧之數不增大兵可支四年今蠶
農方作再運半發老幼疲弊畜乘困竭奈何又苦之
不罷開卽馳詣闕下白於上前矣卒罷之又知曹州
二州真宗初加如京使知代州極言變防利害政治

得失闕至州葺城壘戰具諸將多沮議不協開曰吾
觀昴宿有光雲多從北來犯境上寇將至矣吾聞師
克在和今諸將且危吾卽求換郡徙忻州刺史及遼
師犯邊上書請車駕觀兵河朔四年徙滄州道卒年
五十四錄其子涉三班奉職開喜射嗜奕有集十五
卷作家誠千餘言刻石以訓諸子性倜儻重義在大
名嘗過酒肆飲有士人至自京以貧不克葬親卽罄
所有得白金百餘兩益錢數萬遣之開兄肩吾御史
肩吾三子湜灝沆並進士第灝秘書丞

儀肅州金井里人兄弟四人俱任武職肅當金末以戰
功爲宣撫使攝虢州元兵至勢不能支謂其衆曰吾
非不能死不欲血數萬生靈以釣身後名也遂出降
子叔安爲揚州別駕又爲台州路總管

伯德那西域板勒紇城人元兵下西域舉族歸事親王

旭烈授河東民賦副總管因居河中猗氏縣徙解州
卒贈芮國公子察罕生於河中相者曰是兒必貴國
人謂白爲察罕故名生而魁偉穎悟博覽強記通諸
國字書爲行軍府與魯千戶前後從與魯赤出入湖
廣江西兩省多著勲績大德四年爲武昌路治中武

宗仁宗定大計多所匡益拜中書省叅知政事得大臣體暮年居德安白雲山別墅罕天性孝友田宅之在河中者悉分與諸昆弟昆弟貧來歸者復分與田宅又縱奴爲民人稱長者皇慶元年進榮祿大夫平章政事商議中書省事乞歸解州立碑先塋子外家奴大中大夫武岡路總管次子忽都禿奉直郎高郵府判官孫九人仕者二人濶不花哈撒

岐裕齋三張村人隱居不仕以學行鳴於所居建孔顏曾燕居堂及學舍歲時率鄉人脩祀事習禮儀敘鄉飲少長之節教樹畜敦行誼子孫耕讀以爲世守甘

貧賤無外慕鄉里化之生六子皆以卿名張正有六卿詠祀鄉賢

明

史誠祖洪武末以人才舉陳鹽法利弊上納之授汶上知縣爲治廉平寬簡永樂七年遣御史考覈郡縣誠祖治第一擢濟寧牧仍視汶上縣事職屢當遷爲民奏留後卒於任士民哀號留葬城南祀鄉賢

晁昭永樂庚子舉人除監察御史丁父憂時州同知權法落職而臬司適按部候昭恨昭之不解已也譖於文選郎服闋謫嘉定知縣子繡字廷器敦厚遜讓歷

任分巡雲南道父子皆祀鄉賢

史善宣德五年貢任邯鄲縣知縣有惠政陞鞏昌府通判不阿權貴致仕歸邯鄲人立祠祀之祀鄉賢

龐通泰康坊人永樂四年舉人初任禹城知縣歷陞長史政績甚著其德行鄉黨亦推重之

史宗禮字文博宣德壬子舉人狄道知縣公正廉勤有惠政陞瑞州通判遷本府知府年八十七卒

白資正統五年貢陝西華亭知縣致仕歸囊無餘物所着卓靴二十餘年不易

閻浩景泰庚午舉人知泗州剛介不附勢要有指揮通

巡倉御史虛出通關浩劾之

侯俊字彥傑天順五年貢山東聊城主簿以憂調四川德陽主簿清白謹慎又能平大盜稱神明焉

張英天順歲貢以孝友稱任兵馬指揮使陞淮安府通判有惠政號張佛兒居鄉和遜以琴書自娛年八十九卒子璠以孝聞服父喪泣血十日而卒

王文字貫道成化乙酉舉人幼孤事母孝性沉默詩文自成一家歷任武功汲縣教諭卓立師範人材多所成就雖盛暑必衣冠不干謁致仕歸杜門不出州守重之常臨訪焉祀鄉賢

馬適雲路成化十六年貢
寧縣知縣仁慈端潔謝
政歸杜門靜處而已初適
天旺代兄戍密雲於戍所
生達逢赦還與長兄選真
世其德迄今科第人文爲
解望族祀鄉賢

蒲昭字克明成化二十二年貢
昌樂縣丞爲太學生時
關廟祭田被豪強佔沒奏請
勅部行查勘斷歸正具
碑記呂涇野先生以昭高年
多識修州志多所諮訪
呂子固字孟堅宏治己酉舉
人授富平教諭精性命理
喜著作爲人師以禮法自持
誘掖獎勸多所成就解
組後四方學者益衆著有三
車一覽集子鳴韶嘉靖

十五年貢官元氏教諭甘貧樂道以孝友稱嘗佐馬谿田脩陝西志祀鄉賢

史臣字秉直宏治辛酉舉人任上蔡知縣重學校却巨盜公廉仁恕老成練達臣之祖名弼直隸河間人洪武初知州事勤慎愛民秩滿士民挽留遂家焉後裔相繼登科書香不絕

王光祖正德間貢遊呂涇野之門精思力行研窮理學不治舉子業涇野轉官南都光祖負笈從之涇野歎其篤信好學比歸築室祀先聖賢讀書其中題曰明誠精舍著有龍居子稿

程鵬字萬里正德辛未進士知鄆縣清正自守剛介無私歷知鄧州陞刑部郎中卒於京冢宰王瓊見其囊橐蕭然歎曰於此知其守矣爲具棺殮之祀鄉賢

邱東魯正德丙子舉人少遊呂涇野之門謁選授廣平府同知廉明有幹郡有疑獄十年不決東魯甫下車一言成信讞時太守忤直指且將按罪小民訛傳兵至驚竄四散太守遂單騎入秦東魯屹然不動從容曉諭民始安堵歷戶部郎中以養親告歸著有見聞錄祀鄉賢

李瑤字栗軒嘉靖癸丑進士授蒲城知縣明敏質直清

操凜然會地多盜瑤捕斬巨魁四境寧謐

介一清字白石大張村人偉幹負奇氣而優於學闡策幅不能容作雙行書殿試二甲授兵部主事歷車駕司郎中出知延安鄖陽府政績卓著歸田時遇鄉人大饑賑粟數百石年八十三卒祀鄉賢子孫科甲鼎盛今七世矣

王琰字仲輝嘉靖戊午舉人漢陽知府歷官二十餘年清正剛果所至有聲歸田後敝衣蔬食簡淡自如意其爲顯宦也

侯居良字兼山幼負高才邃於學與弟孝廉居震齊名

弟居坤同登嘉靖丙辰進士時稱三鳳初授淄川知縣清廉有政績治行第一擢監察御史抗疏請止織造又論大學士殷士儋士儋致仕去出按雲南以人文日起請廣解額如內地論黔國公沐朝弼不法滇人立祠祀焉祀鄉賢居坤字至軒累官太僕寺少卿年甫四旬卽解組歸隱居教子居震子加采進士居良子加地居坤子加鬯加乘俱登賢書歷官有聲

孫維清字寅所性溫淳持躬謙謹仕吏部十餘年黜陟平允人服其才居鄉賑恤多善行累官四譯館太常寺少卿在銓部時張江陵爲相維清抗疏論其威脇

中外由是得罪祀鄉賢

鄭茆字茂卿嘉靖四十五年貢性質樸端確自守歷鄆陵訓導膚施教諭金州學正口授生徒得俸金輒濟貧士人多德之致仕歸撫諸姪卹隣里祀鄉賢子國俊國彥相繼登第咸謂盛德之報國俊字檀峰初任中書歷官浙江布政使方正耿直出處如一祀鄉賢子鴻業官中書國彥官吏部司務

侯臣字世勲嘉靖間中書知縣才識超卓爲政務順民心不施鞭朴善惡各有所籍記行可嘉者榜其門由是民風丕變以憂去老幼泣送補三水民畏服如中書

焉

劉登朝隆慶元年舉人聰敏好學尙氣節初令沂水救
荒理獄興學勸農沂民立碑誌之後令棗陽循良益
著以勤卒官

劉從仁字約所主簿登康子隆慶元年貢初授元氏知
縣防槐河諸水全民田數百頃值歲荒賑倉粟給藥
餌全活甚衆陞泰安州知州再調鄆州前後墾荒均
役抑豪右除竄丁築堤護城引水溉田轉灤州以勞
瘁乞歸卒泰安灤州咸祀名宦

楊培隆慶丁卯舉人藍田知縣廉而貞惠行荒政多所

全活民懷其德立生祠子雲梯崇正戊辰進士歷任
內黃玉田望江知縣克承先志祀鄉賢

趙欽湯字新盤博學淹貫隆慶二年進士任掖縣令以
卓異舉擢戶曹出守鳳翔歲荒賑饑備兵甘州甘俗
喜畜牛羊欽湯教以業褐遂貽永利司臬山東疑獄
多所平反累遷浙轄靖倭亂中貴以織礦二役滋擾
持法不爲撓遷京兆尹會加賦抗疏止之轉南戶部
侍郎總督糧餉屯政定改折請蠲恤慎預支凡所
條陳悉合機宜久之告歸卒諭祭葬贈戶部尙書欽
湯性孝友初家貧啖糠糲以粥不令父覺受經仲兒

如父師禮待諸姪如子終身布衣贍助族里無吝色
年七十九讀書不輟著通鑑纂要關公祠志諸書行
世祀鄉賢

李瑱字聰甫隆慶戊辰進士孝友性成旣仕與弟珊同
居終身一無所私弟卒撫育二姪瑱官彰德知府興
利除害郡人德之爲立生祠後官陝西叅政時西陲
徵兵關南人心擾動瑱力爲鎮撫倚若長城及居鄉
溫恭長厚卽奴隸亦恪守禮法不以勢耀也

李春光字實吾隆慶戊辰進士初授保寧府推官精明
廉直陞戶部主事歷陝西布政使擢都御史巡撫延

綏會京察賜文綺盃盤廕一子起戎政侍郎因災變
上言敬天法祖勤政任賢罷開採撤稅使霽雷霆施
雨露補大僚還逐臣填空署已代庖期回天意上嘉
納覃恩蔭一子世襲錦衣百戶尋乞歸家居課子屢
徵不起蒙存問賜白金文綺人驚異數云流覽羣籍
工詩文著有中丞疏稿年七十九卒賜祭葬贈兵部
尚書太子少保祀鄉賢

杜可久隆慶庚午舉人品節高邁工詩文嘗送人北上
云見說容城爲便道憑君寄淚到椒山風節概可見
矣

李希楫字濟宇隆慶間貢官上林苑署丞有王海者爲部役匿糧四十石莫能發其姦轉償於署中人咸苦之希楫據詞申理置之法

蒲三善萬歷元年舉人初任臨江理刑調繁河間服闋起補慶陽歷宦二十餘年廉而不劌致仕歸茅屋數椽蕭然如寒士也子友梅增生以孝聞後裔俱克世其家

介夢龍字潤宇一清子萬歷壬午舉人初授湖州府節推決斷如流兼攝歸安烏程篆遷南京司理督理揚州鈔關治行超卓宿蠹盡除終戶部員外歸田後

游林下四世一堂壽八十二子孫相繼登科祀鄉賢
李峨字雲冲學正增長孫萬歷乙酉舉人歷莒州知州
清廉有聲性孝友撫繼母幼弟如同生急流勇退人
服其高祀鄉賢

趙標字準臺欽湯長子少英敏年二十登第選庶常擢
侍御首請冊立東宮劾罷寺僚又言時政詔旨不信
上下不交臣節不振人情不安四大患識者韙之出
按畿南風紀大振及再入蜀奏免蜀人木運之累楊
應龍據播猖獗當事言兵標力陳當勦狀疏十七
上卒能馘酋成功賑飢民減礦稅露章劾中貴陳增

角野全三
卷之六
二
罪遷臺卿典河南試稱得人轉太常卿以敘播功進
級蔭子轉大理寺卿册封益藩餽贈無所受因使事
歸覲病作竟不起年四十五上遣官致祭標居恒慷
慨重大節不翹人過歷宦無長物博古工文辭著有
經濟全集

侯加采字亮余居震子萬歷己丑進士由河內尹累官
四川遵義副使所至有聲宦橐如洗初仕順德時母
病卽解官歸兄病如之居家以講明性學爲事諸達
官造訪皆謝不見從之遊者稱理學先生

侯加地字慶余居良子萬歷丁酉舉人辰州府推官調

順天府刑獄稱平入名宦加地工詩善書尤敦懿行
與弟加乘各輸粟賑宗族

范啟科字象盤國棟子萬歷戊午舉人初授陝西商南
縣縣多礦盜啟科勦獲其魁楊省並黨數十人以薦
調邵陽時寇氛充斥吳且譁賴以定總督洪以邊才
薦遷慶陽同知駐靈州城爲河衝忽河套數十萬騎
圍靈者二十七晝夜啟科運木石督班軍寢食幾廢
卒保安全署道篆半載謝絕蚤緣歿於任生平讀書
外無他嗜長於詩每登臨輒有咏祀鄉賢

李希樸字茂田天啟元年舉人署汾陽學博陞泗州知

州淮數決楨脩固之革飛馬去漕運爲地方身任利害登上考擢刑部員外歷郎中積案一清法不容貸者執如山雖權貴不能撓出爲莊浪道與羌雜處楨浚塹設壘謹飭烽火戰具令部曲相保西陲以寧歸田後閉戶課孫絕迹公庭逢令節諸子諸孫及親屬羅拜堂前問不能及但頷之而已年八十四卒

趙躋昌字昇運天啟辛酉舉人初授介休縣教諭德教最著陞咸陽縣知縣尤著循良闖寇破城罵賊不屈死祀鄉賢

王國訓字振之天啟二年進士歷知金鄉壽張滋陽武

清誅鋤姦僧肅清風化坐大計免久之補扶風國訓
性剛嚴恥干進故官久不遷八年賊來犯嬰城固守
閱兩月外援不至城陷罵賊死贈光祿少卿賜葬廕
一子入監祀鄉賢

介松年字赤仙元善子嗣元正後少負才名崇正辛未
進士授益都令舉卓異艱起陞禮部主事剔釐積弊
會行軍擢戶部給事中督餉南行至保定京師已陷
抑鬱成疾卒

李希稷字又田瑱次子素行端謹無貴介氣孝事繼母
撫孤姪有成由歲貢任歸安府訓導歷陞大同府教

解州志 卷之九
授移疾歸杜門恬養士論重之

李爲榷字泰九以父蔭歷官南北戶部郎中宦情恬澹
未幾引疾歸所居素園三十年絕迹公庭崇正未加
糧徵急有困窶者榷出數百金代爲納之歲稔散賑
施棺諸多善行

國朝

李肯字元仲前明舉人雄偉有岸略聲如洪鐘初知孟
縣調良鄉擢山海道 國初起濟寧道闖變後賊猶
未盡平肯勵將士擒獲輒盡法治之賊忿甚一日伺
肯出伏黨數十人於路猝出擊之左右胥駭散因被

執脇以利刃不爲動大罵不屈遂遇害事聞贈光祿寺卿廕子入監

喬廷桂字芳一凌雲子少貧嗜學年十五登第選翰林庶吉士歷任文衡擢侍讀學士酌定州爲大學入庠廣額性恬素公事外閉門索居不隨時尙外轉例補臬司遽引疾歸晚號拙守山人年八十二卒祀鄉賢侯佐字東俾前明進士知建平合淝有循聲擢刑部主事調吏部考功司員外郎順治己丑罵賊不屈與父嗣晉皆被害祀鄉賢

劉曰晏諸生事親孝順治己丑姜襄之變寇且至依父

角州全志 卷之九
四
不去賊歎其孝而釋之比歿哀慕不忘八載不入妻
室

楊原澄字湛若順治己丑進士初授益都縣知縣陞兵
部主事轉郎中補廣東僉事歷官勤慎以勞瘁卒原
澄天性孝友接物平易祀鄉賢

馬淑援字亦波號濶庵近樂子年二十一中崇正己卯
舉人順治三年會副初授福建邵武府推官丙午本
省同考歷任四載舉卓異會奉裁改補杜門不復出
淑援淹貫載籍纂州志爲一時文獻勤於課子科名

相繼

介舜年字雲樞一清曾孫夢龍孫順治戊子舉人汜水
知縣已酉本省同考性方正不可干以私友愛昆弟
周卹姻族教子孫咸登科第人以爲盛德之報

介孝璫字長褐松年子康熙甲辰進士授撰文中書轉
兵部武庫司主事提督江南蘆政尋卒工詩文有仙
才之目懷經濟未竟厥用人咸惜之

李興高字大生燉孫康屬八年貢初授湖廣澧州判陞
河南商水知縣慈祥屬屬勤恤民隱居官三十年所
至尸祝

李峴壽字小高己未進士涑水縣令風骨自樹不畏

疆禦振興文教賑濟飢民上官以臺垣薦尋病卒涑
人立祠歲時享祀

介孝瑞字輯五舜年長子乙丑進士戊辰殿試二甲候
選知縣性嗜學登第後杜門却掃著述自娛意氣豪
爽賁志而歿士林惜焉子錫周孫玉潮相繼登科躋
卿貳列部曹克昌厥後云

介孝璿字衡玉舜年次子嗣椿年後康熙丙子舉人知
浙江海鹽縣甫九月遽卒於官孝璿承家學嗜讀書
以閎博聞旣舉於鄉窮年矻矻討論不輟嘗網羅州
境暨隸縣典實排纂成書而田賦鹽政利弊尤稱精

覈比筮仕能以經術飾吏治人胥重之

介孝璿字荆韜舜年三子庚辰進士選庶常轉編脩纂脩國朝功臣傳辛卯典試福建所拔多知名士評者有八閩文風駸駸日上之語坐闈中失察罷歸娛志詩書不與世務嚴氣正性戒飭子姪時以謹厚儉樸爲訓續修州志輯略尤工制義膾炙人口卒年七十有五

介錫祉字召似號學倉康熙辛卯亞魁海鹽令孝璿子幼承庭訓學識宏通四上公車不第天性肫摯篤於孝友家貧淡泊慷慨好義州守議建書院願輸白金

不自知無以應也長子玉濤歷任劇邑著有循聲次
子玉澤爲名諸生肅稟義方云

馬允尙字次呂淑援五子康熙甲午舉人知龍游縣清
理積逋二十餘萬盡力搜剔宿弊頓除再調餘杭拯
水患鋤豪惡政聲翕然旋解組歸囊橐蕭然惟攜書
數篋而已

人物

南北朝

柳察躬從裕子爲德清令世德廉孝颺於河滸士之稱家風者歸焉

宋

董孝章真宗時十世同居見大明一統志

舊志以爲夏縣實州人

婁應字循之少負智勇尙氣節祖興起家於解不數年

遂致富盛元豐間虜屢犯邊朝廷出師深討應爲解

戶籍首計家產過一縣之多科率比他處三倍應以

罄產爲誓逮邊事少寧產已隳蕩八九未嘗有纖毫

介意復自發憤整理家業不數年十倍於前會納粟
以贍邊備應輸糧授將作監主簿子三人授授益州
助教絢應進士舉官脩武郎純聰明豁達有父風孫
康慶州助教

金

南濤大定初貢士長於文學一時碑志多出其手

劉制文學與南濤齊名著述甚富尤工書

關漢卿工樂府著北曲六十本文致曰關漢卿如瓊筵

醉客

見通志

明

陳仲良洪武間貢除湖廣岳州府推官平恕清謹任滿
乞歸夫婦徒步行李自負焉

呂讓永樂間貢生以孝稱

尙淵永樂甲午舉人刑部主事文學有名

李濡正統甲子舉人歷掖縣曲周教諭爲廣文四十餘
年行檢端正

李福榮正統四年以捐賑旌門

楊孝忠辛莊村民正統六年詔富民出粟備荒政孝忠
指困輸一千四百斛無德色旌爲義民州守吳惠立

碑以誌之

孫志景泰間貢開封知事剛介自持無所屈撓

張習景泰間貢上林苑署丞陞苑馬寺丞居官勤慎

柳溥字子廣成化十三年貢鄆城縣丞練習馬政廉靜

自持

閻清字本澄成化二十一年貢在太學思親馳歸終身
不仕

呂篔字品器宏治六年貢江寧縣主簿有文學名

王卿宏治五年貢任登州衛經歷剛正無私不計利害

王玉瓚字子中正德十六年貢任武進縣丞立志堅確

問學該博尤長於詩祀鄉賢

李木字石巖嘉靖間舉人歷戶部郎中鄉人稱其孝友
侯得之歲荒賑粟七百石

李暹監生寧州吏目廉勤自勵

王詢好學明理性至孝嘗建祠堂歲率子弟修祀事

馬鳳鳴字腴田達之孫萬歷三十二年貢官河南府知
事年九十餘謙恭自下鄉人重之

譚奇字讓吾萬歷間貢榆次教諭訓士有法品尤廉靜
李棟廩生以孝友稱主簿劉應鰲以好義著

孫維藩字屏所萬歷四十八年貢任長安教諭介直不
阿却暮夜金見陝西通志

解州全志 卷之九
侯加纓字請廷恩貢授知縣以廉謹稱

李邦才字擴齋以儒學醫博覽羣方脉通太素尤精於
東垣十書診視罔不奇中以明經入太學當路相推
重以母老辭歸祀鄉賢

李師泌字唐賓天啟舉人制行端方卓然自立子櫟增
生以孝行公舉

王毓麟字鍾宇明之子歲貢授漢陰知縣居家儉素銳
意讀書世業戴經因名其塾曰學禮館從學者甚衆
介元善字中含夢龍子崇正庚午舉人性孤高傲視一
世晚年居山不出壽七十九

李在公字魯生邦才子性至孝崇正癸酉舉人海門知縣卒於官

李衍祥字吉吾歲貢肥鄉縣訓導溫和公謹

張國選字懷雲成翼子問學博雅立身不苟歲貢授成
都訓導遷萬縣教諭

侯世汾字修之加乘子歲貢任通判 國朝順治初薦
舉人材交檄催迫謝病不行

趙曙字旭宇標長子例貢鴻臚寺序班性行真實事親
孝居母喪尤克盡禮又以官生讓季弟晟人多稱之
呂論廩生三婁村人事母孝祀孝義祠

解州全志 卷之九
譚應春幼孤力耕事母以孝聞州守魏養蒙表其門

介一洲以醫濟世全活甚衆祀鄉賢

侯大本撫孤賑貧拾遺遺金鄉里稱之又李通亦拾金不昧

王梅與弟梯兄弟同居無間言梅子兆祥梯子兆吉遵家法以友恭稱其後子孫繁衍同爨如故

王家侯庠生明季奇荒捐粟五十餘石貧不能葬者施棺百餘具翰林喬廷桂表其墓

王旌召庠生性敦厚授徒以節義爲先一時遊其門者多通儒忠烈趙躋昌其最著也孫宏登 國朝順治

丁酉賢書授朔州學正

國朝

侯世科字抑之加地子順治四年貢河南嵩縣訓導甫
四月丁內艱歸遂絕意仕進徜徉山水間以詩酒自
娛州守稱其高數舉鄉飲

楊攀桂字月賓庠生性孝友才優學贍順治六年學政
盧表其門曰謙尊而光舉鄉飲年七十五卒

楊愈節字柱瀾雲梯子順治九年貢少嗜學畜書最富
寒暑不輟力追博雅申歲逆闖構難考掠富室舊
家號曰北餉節以父需常曾令望江亦在北數中急

辦百金往蒲輸限道逢廿一史內府物也見而悅之
欲以輸金市從者力止之節曰極知比餉急使卽死
亦已矣萬一不死而此書落人手豈非終身恨事竟
買之賊帥聞釋不復比人號書淫著有閒吟集

李仙允字昌男康熙元年貢山東膠萊運判再轉揚州
運判性情豪邁意豁如也

介元佑字右人歲貢高潔端亮與人交胸無城府尤喜
文學士淹博能文著有歷朝統系藏於家

馬允邵字幼越淑媛四子幼聰穎爲文閱博秀麗中康
熙乙卯副車屢試不售遂絕意仕進好吟咏與弟龍

游令允尙極壘篋唱和之樂舉鄉飲

李肅字斗南性孝友攻詩書家無擔石好義不倦州人思之爲立義士碑

王龜銑字渾如品高學邃博通舊典風韻翛然弟龜鏡字季光事母孝母性好潔曲體如意時稱王氏二難先是銑之父名朴字完朴自蒲徙州冲夷高簡脫然町畦之外以琴書自娛州守江闔高其行式其廬後人世守清德爲州望族

介錫齡字昌裔孝璿次子嗣孝瑞後早負文名康熙辛卯舉人官河南西華知縣值水災錫齡力請郡守發

賑民賴全活次年復旱盡力捕蝻焚香默禱恤監獄
清案牘創設義學民風丕變旋以隣案波累落職歸
橐蕭然尋以疾卒

李翔鶴字鳳屬與兄翔鵬同中康熙壬午舉人知行唐
縣創設義學清理丁徭性仁厚不事鞭朴而摘姦發
伏如神子廸字惠吉雍正庚戌進士歷知平番金縣
隴西三縣陞署涼州府同知

馬詒型字儀型淑援孫性孝友讀書不爲章句教子若
熊登賢書

趙昕州人運庠生富而好禮施濟不倦生七子俱嗣書

香登科第

侯如礪字憲伯庠生學問淹通杜門不與世務力遵宋儒格言執經者甚衆率皆成名

李瑗性孝友以歲貢選岳陽司訓教士先德行而後文藝曾書座右云居一官効一官之職位一日盡一日之事先是瑗父倬有隱德嘗以誠敬訓瑗克承家學張文驥字龍光縣丞隆慶庚午舉人張克明之曾孫意氣慷慨人多感之

王善繼字繩先明贈光祿國訓曾孫以廩貢授潞安府司訓尋以病歸居王官谷數十年未入公門好義樂

施多所賑恤乾隆己巳歲荒散粟百餘石以周貧乏
嘗捐修祠宇助建解梁書院設義學置田以供膏火
舉鄉飲大賓子天福天祿先後遊庠

王肫字仁齋例貢居鄉寬厚遇族黨婚葬事輒濟其匱
乏乾隆十三年大饑盡出積粟保全隣里甚衆

史恂字孚中歲貢任蒲縣訓導事繼母孝友愛異母弟
弟早卒撫遺孤如己出祖業盡歸之舌耕自給取與
不苟

介錫彤字勲侯孝璿三子幼穎悟絕倫讀書數行並下
爲文按晷立就博覽載籍質以疑難無不窮源究委

示之甫登鄉薦賚志以歿士論惜之

侯永衍字綿公乾隆六年貢孝友克敦取與不苟爲諸生三舉優行撫孤姪皆克成立造就後學七十餘人及歿門人立碑追慕之

李霖字時菴臨高知縣繩祖長子性至孝年十七隨父任能左右劬勤父卒於官踰山渡海扶柩歸里弟霽侯選縣丞慷慨好義倡議請建州中試院士咸德之董其鈿庠生事親孝父母歿遊學河南逢令節必歸省墳墓至老不衰課徒以誠卒多成就陝州人士咸思其德歲時致祭云

陳居仁禮賢坊人家貧落魄負擔爲業事親孝雖菽水必盡歡父嗜酒日進杖頭以悅其意怒而笞之跪受不敢辭與弟居信友讓彌篤人呼陳孝子

張士彥力學敦行早卒弟士品性敦朴務耕讀撫孤姪廷璫登賢書州舉鄉飲辭不就

范秉正性孝友置義田贖孤姪還遺金州守彭表其門杜克勤赤社村人勤儉起家喜施予康熙六十年出粟四十石以賙隣里子于泗于漳克濟前美散麥貸穀無吝色

馬宗文歲貢好學敦誼力追古人

增生孫雲鶴幼孤奉母至孝母目盲復明以上壽終人稱孝感又好賑恤州尉江歿無棺殮鶴助以衣衾有夢中拜謝之異

副貢李廷標生員張煊李希晟雷時呂叶宮及雷恒呂叶商王建興王建盛蘇培湛歲貢李智俱以孝友稱生員姚受是貢生馬猶彪生員劉百孝監生胡吉相及張成範高好謙李紆賈士英俱以好義著

生員王翕字式好以長厚稱訓子中登賢書

趙俟命字居易敦本力行訓後有方子文烜登乾隆戊

午賢書

李鳴璋性孝友年十二卽自力田事母撫弟弟暱匪嚴
飭之弟遂讎璋璋恐傷母意誓不讎弟及死且代爲
輸逋仲兄遭訟璋復鬻產以濟之居母喪悲痛成疾
乾隆四年州守彭欲旌其門璋力辭不受

劉雲顯行端好施鄉民失糧鏹欲自盡雲顯細詢其數
貸以己金又贖回貧人鬻女且給以粟年八十無疾
卒

耿復恭五世同居學使州守並表其門

雷潛雷家坡人敦本好義有典地四十餘畝價值四百
金遺命子貢生傳道助入解梁書院爲膏火資

曹淵深泰康坊人。事繼母閤如所生。閤病癱，目盲，淵深晝夜扶持，躬侍溲溺，無倦色。

霍重光，候選經歷。賦性醇厚。康熙五十二年歲歉，散穀百餘石以賑。